

四庫全書

集部

欽定四庫全書

集部

新安文獻志卷五十五上

七

詳校官中書臣孫衡

侍讀臣孫球覆勘

總校官庶吉士臣倉聖脉

校對官中書臣吳甸華

謄錄監生臣黃佑

欽定四庫全書

新安文獻志卷五十五上

明程敏政撰

律詩七言

過徽州別魏府尹

汪廣洋

與君攜手鳳池東
題遍春階芍藥紅
況復雲山千里別
豈知風雨一尊同
少陵老去憂多病
王粲年來喜事戎
二十五灘煙水急
幾時歸櫂月明中

使歙諭番易

五嶺蒼蒼劒插天肩輿高下似乘船殘年止有二十日
沽酒豈無三百錢野碓暝春喧急水山樵寒雨隔孤煙
祗慙將命恒馳逐安得雄才配馬遷

過河陰觀楚漢遺壘

廣武山前望虎牢淡煙衰草沒城臯鴻溝豈限長江險
楚壘何如漢壁高此日登臨悲鳥道當時南北混鯨濤
河陰老樹森幢蓋猶似鑾輿駐白旄

康山觀兵

樓船兩翼挾艨艟垂老觀兵膽亦雄
砲火震天飛霹靂剛風立海走豐隆
重瞳首寄龍泉下獨眼屍歸馬革中
戰罷神威猶震怒蒼涼落日貫長虹

登步雲樓

詹書

百尺丹梯接紫微層層金碧炫晴暉
眼觀下界雲生足人語半天風滿衣
酒醒客猶招鶴舞詩狂我欲跨鯨歸
休將鐵笛吹清夜月滿闌干星斗稀

送徐復初海道知事

東運樓船白粲多紫髯英氣有誰過礮車雲起天垂野
颼母風來雪湧波海上神仙見徐福關中父老識蕭何
幕賓不盡長才用早晚薇垣響佩珂

秋夜書懷簡李希吉

江皋秋水明晚霞江城秋滿詩人家雙杵隔牆夜敲月
一燈向壁寒生花烏鵲驚風繞紅樹紫蟹帶霜行白沙
清虛之府入幽夢醒看河漢思乘槎

題定子靜草堂

草堂正在匡廬山山陰綠玉相對閒雲從雙劍峯前下
潮到小孤江上還茶煙滿室寫墨竹花雨一簾觀白鵬
誰似南宮能篆古為君高置軒窗間

贈汪仲魯

趙 沆

短話長言總勿疑相交動是隔年期坐來竹雨初晴夜
看到松雲欲盡時雪後孤芳誰復惜空中靈響妙難思
山花滿眼春將半莫厭從容步履遲

贈曹元達子

故人別我今幾秋見爾難禁雙淚流一家寄食悲南國
千騎擁麾雄北州轉戰不知何處在相逢未擬此生休
清門生理依諸舅長大廢書吾漫憂

省朱文公官坑祖墓

攢簇千峯一嶂開乾坤間氣此胚胎百靈受職環真宅
五緯回光拱夜臺魯國共悲祠廟毀閩關不見子孫來
干戈未息諸生老獨抱遺書詠七哀

和先巨山翁登岳陽樓詩韻 汪周

雕闌十二屹層空誰架危樓土宇中漫浪微蹤悲老馬
登臨衰目羨歸鴻三江去櫂飛晴雪二澤征帆挂晚風
安得羽翰生兩臂回頭歷歷大江東

楂山書堂

汪克寬

楂山岡上長松樹曾見仙翁舊隱居種竹閒留雲作塢
灌花斜引水通渠娛親壽酒朝開宴教子寒燈夜讀書
回首風流陳跡冷摩挲殘墨淚霑裾

次韻寄來碩

汪德慶

林下三間屋當巢嶺雲溪雨送波濤夢回塵世風光別
眼底秋山氣勢高千里關河思稅駕三年冰雪苦持旄
知君不作鴟夷計長日焚香坐讀騷

次欒秉德韻

程國儒

傷心世事淚潺潺已付餘生作等閒
羝乳尚能持漢節雞鳴那得出秦關
黃花時候多新酒綠樹門庭是故山

日夜思親頭盡白何人為賦大刀環

至正十九年明兵圍衛城城陷國儒

以都事被執過新安賦此詩至京不屈安置天界寺以條自經為僕者救免無何聞子仲鏡喪哭曰天其奪予

志乎儒之不顧身者以有鏡代養也鏡已死二親疇依
數月召授內省都事歲餘除洪都太守期年政成坐事
被繫因述平生出處自盡民知非辜撫屍而哭者肩摩
踵接遂附葬徐孺子墓側祠于東湖書院先師堂有雪
崖文集
藏于家

過方山近城田疇蔚然喜而有感

鄭潛

西峽渡舟潮水平籃輿歸路午風清河流合處總入海
山勢方時纔近城綠野熙熙民樂土紅巾擾擾將偷生
觀風問俗慚吾事深谷何時遂耦耕

次韻皆山樓韻

朱模

試從此處登樓看天下新安山最多一塢迴環盤谷宅
亂峯高下洞庭波巖花逐點飛紅雨雲氣成羣散白鷺
共說琅邪山水似未知歐老意如何

送張總管赴番陽

近聞使節向番陽已報前軍到武昌好過黃州問蘇老
曾遊赤壁訪周郎一時人物皆陳跡三國英雄此戰場
舉酒煩君酌江月匡廬秋色晚蒼蒼

程仲庸遊京口留金山

唐桂芳

我正無心懶似雲
那堪奔走污緇塵
飛花岸柳偏留客
吹浪江豚忽拜人
玉帶暫拋煩轉語
楞伽曾寫悟前身
異時好說金山寺
小小漁舟喚渡頻

送鄭士恒往江西

洪都昔號雄
西土畫省新
開列上台鄭
老每從工部飲
烏公何待石
生媒斷雲將
雨侵書幌
明月隨風落
酒杯
山獠洞庭皆
入貢海船日
日候潮來

漁梁結屋

姚璉

石梁之上姚家莊隔溪指點雲蒼蒼飛樓傑閣說華第
翠竹老梅惟我堂新豐雞犬歸未得韋曲桑麻如許長
三間茅屋投老計攜兒擬拜龐公牀

符溪凱旋馬上作

俞茂

夜來一雨洗囂塵陡覺江山氣象新巖谷已平蒼鼠穴
溪橋喜見古梅春挈壺歡逐民連野策馬歸來雪滿身
此地重過又三載謾留詩句託青珉

雲陽李祁序云新安俞公鎮禾川之

三年威惠孚洽四方諸寨以次削平獨有曰符溪者既服復叛反覆變詐百端終不可化公一夕駐馬龍溪橋令諸軍蓐食聽命逮二鼓乃指示所向方黎明至寨門外分布士卒破寨悉擒之縛其渠魁誅黨惡數十人餘平民附寨而居者縱遣還舍猪羊雞犬悉令認辦給還民大欣悅爭持酒物來獻公又一無所取慰諭而遣之凡二日處置事定乃歸停醖在前鉦鼓在後觀者羅拜舉手以謂積年兇惡之寇一旦授首非公之才智未易了此公既還府賓佐咸集公獨留儒學士十數人列燭張宴至夜分乃罷坐中口占馬上所得詩於是衆賓咸和至次日乃緝成卷僕忝預席末不得以老病辭乃從衆賓之後而和之曰溪橋石路不生塵幕下初聞號令新士卒銜枚衝夜雪將軍橫槊賦陽春已擒渠惡從衆首未死么麼許乞身德意久孚威力著愧無椽筆紀蒼珉又和曰城西車馬蹴輕塵夾道咸瞻喜氣新茄鼓闌歸銀燭夜笑談傾倒玉壺春知君自是文章手愧我空

餘老病身多謝口占詩句好肯拋良玉引凡珉意淺語拙如老婦舞柘枝不自覺醜然亦以調高韻阻難以追逐又如陽春白雪和者良寡僕故欲別作一卷請諸君各以已意賦之不必步韻或選或律或長短句任意所到庶足以盡諸君之才且於俞公之行事亦得以鋪張盛大而無拘牽局促之患也

懷鄉友汪彥才

此詩誤刻林鴻鳴盛集中詩所稱萬安松蘿皆休寧地名也

任原

浮雲聚散幾悲歡
久客懷安憶萬安
門對西山朝氣爽
城臨東海暮潮寒
身隨斷鴈兼秋遠
夢入踈砧向夜闌
為問松蘿舊遊好
別來風月共誰看

送舒從事還南海

老逢離別倍傷情一騎臨秋復遠行
客路驚心孤鴈影家林入夢斷猿聲
朱崖落日天低海銅柱雲寒雨過城
翻憶舊遊多感慨獨嗟書劍誤儒生

丁酉冬與楊季成宿邑南田家夜次趙子常韻
呈徐縣丞張總管
金居敬

擁被依爐話夜分山城更點喜初聞
客懷茅舍青燈伴詩思秋空白鴈羣
冷掾官曹閒似水將軍車從密如雲

東湖孺子文章伯旦暮移尊獨向君

賦靜菴

吳顯

收歛江湖萬里身歸來林下岸綸巾從前歲月方知謬
自此光陰始是真止所常觀虛白室行邊不踏軟紅塵
野人亦得煙霞趣布襪青鞋願卜隣

書師山先生所題黃山崖石後

鮑頴

蒼崖百尺與雲齊徵士重來為品題姓字一時通漢史

文章千載並浯溪
春深莫遣莓苔沒
日暖應添紫翠迷
猶憶匡廬當日事
短檠山雨五更雞

和商山書院諸公韻

汪天應

覆雨翻雲已十春
恨無詩酒對芳晨
秦強再世終歸漢
周弱何人共戍申
邊境旋聞烽火息
南風喜見稻花新
為霖更得成豐歲
願作陶唐擊壤民

過周流寺

王善慶

雲埋殿閣周流寺
春水衝撞復到山
僧衲挂枝庭樹老

禪牀搯石洞雲閒久無山鬼吹燈火時有淵龍護法壇
我亦長歌來徙倚滿襟清思隔塵寰

洪武庚申五月四日謹身殿災肆赦

范 冉

金雞銜詔五門開聖澤汪洋遍九垓梁獄不羈天下士
漢庭還網世間才傳巖弼亮霖雨沛上英雄起草萊
郡國想今寬賦歛乾坤和氣一時回

賀金彥晦遷居避暑

黃 樞

隔水移家不借車
野航安穩載琴書
青山歷歷迎人慣
翠樹團團繞屋踈
盤谷有誰爭子所
斜川亦自愛吾廬
行看花萼相輝映
依舊連雲列第居

寄淳安徐大年

吳舜舉

歛南山去一百里
秋盡春來信不聞
昔日登樓同聽雨
今年幽谷飽看雲
管寧豈是遼東客
伯樂曾空冀北羣
安得俗塵長撥置
挾書林下共朝曛

讀文丞相指南錄一

素手殘棋豈易談一支大厦已難堪死灰無燄資炎土
磁石貞心託指南閩粵九重天再闢燕雲一死志猶甘
人間竊祿偷生者未抵南柯一夢酣

二

西北神州久陸沉東南王氣半淪陰諸公戀戀湖山樂
此老拳拳社稷心烈日秋霜存壯節海雲江月助行吟
捐軀報國元無悔可是前朝俗化深

亂後述懷

吳賈

藍輿傲兀飽看山舊隱重來蕙帳寒囊重正緣詩草富
杯長那覺燭花殘悠悠今古知心少擾擾風塵會面難
縱有故園春信在可憐無驛寄平安

上巳日苦雨寄汪彥暉

朱同

三月三日苦泥濘春遊無計令人愁雲低暮色近垂地
風捲濤聲遙撼樓青天白日定何所急電轟雷方未休
最憐桃李花開處雨橫風狂不自由

送李孟善御史謫戍遼東

詹徽

丹墀分袂出長安疾貶遼東去路難金佩暫辭雙鳳闕
玉驄應過九龍灘沙邊鴈度家音少嶺外猿啼戍月寒
孤負十年窓下志挈書攜劍與誰看

紫陽觀席上作

曹 遷

紫陽山中神仙家青山繞屋生煙霞枯林風過落黃葉
寒菊雨餘開白花隻雞斗酒自可樂千駟萬鍾何足誇
興闌攜手過橋去斜日稻田飛亂鴉

和唐胡明經詩韻二首

明經名昌翼本唐諸王
孫避地婺源考水胡氏

因從其姓雖舉明經
義不仕梁終隱于家

呂旭

西出長安避戰塵誰知龍種異常人移根仙李雲霄遠
奕葉猗蘭雨露新曠野驚弓無折羽滄溟脫網有遺鱗
甘為商皓終辭漢不作燕丹久質秦

萬事榮枯夢一場百年歲月去堂堂鶴歸華表人寰異
鹿走關中霸業亡保障未能依尹鐸宗支誰復認丹陽
棄將軒冕身終隱博得山林興不忘

程普屯

瑞昌縣本古赤烏鎮吳將程普屯兵于此以應周瑜一日有羣鳥飛集軍中占

之以為祥瑞翌日果得赤壁
之捷遂改赤烏為瑞昌縣

孫英

赤烏古鎮江之濱云是程普三軍屯羣烏飛鳴祥瑞應
二龍爭戰雌雄分天便東風旗鼓進火烈北船人馬焚
只今過客悲前事目送寒鷗殘照昏

過南陽臥龍岡謁武侯廟

千古南陽草樹荒行人猶說臥龍岡國歸蜀主三分定
才過曹丕十倍強羽扇綸巾勞想象木牛流馬恨遺忘
英雄事業垂成日忍見營星墮夜光

雲溪萬松嶺程內翰墓

汪 洸

內相遺蹤何處尋
萬松青鎖鬱森森
兩行翁仲標黃壤
十丈穹碑倚翠岑
雪案幾人燈火志
冰巖千古歲寒心
清風不斷雲溪上
冠劍空遺草木深

和彥珍韻

程用晦

閒來遙憶隱君鄉
門擁荒山帶夕陽
苔暈旋添蒼徑滑
松陰時轉北窗涼
高懷君軼朱仁軌
癡性予慚顧長康
何日相從陪夜話
石爐湯沸紫茸香

和松明火韻

程億

蒼虬誰取赤心然
女緯男經夜不眠
處士謫居離絕壑
大夫功滿上凌煙
千年琥珀憑誰得
一點靈光可自全
不照綺羅筵上客
分輝田舍及漁船

送方伯潤蘿山讀書

余鏞

一上蘿山數千仞
學如九轉煉還丹
且將圓木驚宵枕
莫厭斷齏供晝餐
松葉亂雲孤嶂暝
杏花疎雨小窗寒
樂羊莫起思家念
更誤佳人機杼難

泗洲

鄭桓

行盡淮東始見山孤城雉堞面層巒
隋人罷幸餘荒苑漢將成功有廢壇
落日波濤來洶湧高秋鼓角動悲酸
北來倦客偏懷古對酒狂歌強自歡

題野航卷

邵誼

楓葉荻花秋氣清扁舟不受波濤驚
一聲櫓歌日欲晚半榻竹影風初生
幽人落落雲霄志小窗悠悠江漢情
夜闌酒醒萬籟寂似向沙頭弄月明

見山堂

胡安

家住龍山山下村
誅茅卜築傍雲根
呼兒耕罷勤書策
對客哦成共酒尊
紅雨過簾花結子
綠雲垂地竹添孫
靜觀自得悠然趣
何用區區隱鹿門

洪氏節婦

姑婦孫媳
孀者三

唐和

苦行相聯世罕論
弔生傷死倍銷魂
百年貞節惟三婦
半世孤孀在一門
燈火絲麻終白髮
憂愁風雨共黃昏
不緣鉅筆標名姓
誰識洪家孝義村

赴遼府紀善次諸公見贈韻 程 通

忠孝男兒合兩圖每回回首自踟躇
王來海上初開國親在江南久倚閭
宣力可能勞汗馬報恩全未及慈烏
曳裾終夜空長嘆似覺中心半負初

雨後

李道生

山中曉起喜新晴杖屨尋詩獨自行
幾樹好花春盡發滿溪流水夜來生
遊絲拂地應千尺啼鳥喚人時一聲
赴暖田家曝蠶種朝朝節候是清明

和李大尹韻

俞韶美

積雨瀰漫漲遠天
客窗惟覺恨綿綿
已添野色供春望
更長灘聲攪夜眠
繞屋斷雲常黯黯
投林歸鳥自翩翩
漁郎罷釣纔相過
為報新潮到石田

石耳山絕頂

游蘭仲

石耳山頭望大荒
海門紅日上扶桑
山連吳越雲濤洶
水接荆揚地脉長
春樹林煙迷近遠
晴虹分字入蒼茫
蓬萊咫尺無由到
獨立東風理鬢霜

東園即事

汪又亮

小圃臨山效采薇間中足跡往來稀垣高拍畫花香冗
地暖先春菜甲肥流水壁間通石罅清風門外掃漁磯
乾坤俛仰情何限孤鳥殘雲已倦飛

三松軒

序云昔陶靖節撫孤松崔藍田哦二松杜工部種四松秦始皇封五松鄭處士

號七松其愛松均矣何其所取之多寡不倫邪
蹟溪吳彬富成初一軒號三松豈欲酌其多寡
而為之中制邪然古稱槐三木假山亦三率取
微其後之昌且賢也富成之三松將有慕于是
邪富成世居商山由其祖師隆
運蹟溪蓋碩宗也詩以諗之

程仁發

沖霄龍骨雨苔斑
鼎峙蒼然伯仲間
勢傲雪霜堅晚節
耻隨紅紫鬪芳顏
王家德識槐當戶
蘇氏名高木假山
欲向主人詢藝圃
清風蕭颯動柴關

湘渚圖

方勉

湘中景物最清奇
邂逅披圖慰遠思
雲慘蒼梧虞舜廟
崖高渚水次山碑
苔花蝕刻人爭寶
竹淚成斑世共悲
千里江山歸咫尺
風光觸目總堪詩

酬贈叅將張公惠劍

轅門大冶藹祥光并鐵花鎔百鍊剛虹見晴空歸匕首
蛟藏秋水鑄千將金鑲雪柄誇新製寶鞘絨條盡巧粧
帶霧持來意何厚從教官道絕豺狼

歛學歲寒亭次宋蘇文定公韻

楊寧

幾樹蒼松倚翠屏小亭因得歲寒名月來遙見海蛟出
風度靜聞天籟生飽歷冰霜心不改高隣庠序景逾清
閒來獨據胡牀坐一曲陽春愧繼聲

送汪司倉燦赴官泉州

除書新領向閩中
建業相逢話轉蓬
別處一尊浮大白
到時三歲理陳紅
道傍荔熟香塵起
海上風來瘴霧空
遠大屬君君莫負
舊家原近紫陽翁

求太守永嘉孫公寫梅

正統甲子

程信

文采風流世所難
更將春意發毫端
平生自保冰霜操
近日誰登翰墨壇
肯許官曹臨鏡寫
絕勝江路倚蓬看
與公篤好無他意
只為貞心耐歲寒

出巫峽寄宗伯姚大章同年

景泰乙亥

入峽猶登兩月程一灘過處一更生愁聞澗樹黃鸝語
夢憶彤庭仗馬鳴險易只應堅素守行藏寧敢負同盟
相思併入巴江水不盡滔滔萬里情

東巡回渡遼河

夷部曾傳自契丹漢疆今已盡三韓喜功不話封侯易
直道何憂行路難塞上塵飛驚馬到斗南雲淨看鵬搏
提兵再駐遼河上白草霜風歲又闌

南征過武昌

成化
丁亥

月滿秋江霜滿天
提兵夜上武昌船
山川依舊環千里
戰伐空餘史一編
霸主賦詩雄異代
仙人乘鶴去何年
吟餘起視青萍劍
一道晴虹貫斗邊

夜雨

趙德相

黃昏燈火雨瀟瀟
愁緒無端結未消
方寸地寬留宇宙
一枝巢穩借鷓鴣
城頭鼓角驚殘夢
江上風雷送遠潮
蕩蕩恩波流四海
深慚華萼自蕭條

滕王閣

吳遜

一葉扁舟挂晚風，崢嶸樓閣畫圖中。
天連彭蠡三湘碧，日射匡廬五老紅。
壓座文章誰再續，動人歌舞亦成空。
浦雲山雨仍朝暮，撫景留題興不窮。

賀張士峻造屋

吳麓

舊家城市厭澆漓，林下經營百世基。
山擁翠屏遙對牖，泉鳴玉竇細通池。
春風座上常留客，夜雨燈前自課兒。
從此鶴汀無限好，杖藜來往更無期。

秋吟得趣卷為藏溪汪彥度題

危亭翼翼碧溪濱每向秋來得趣真
風露九霄清到骨水天一色淨無塵
斜陽樵擔穿紅樹明月漁歌起白蘋
何日重來同徙倚一尊還待菊花辰

題赤壁圖

汪德

鯨吞蛟鬪決雌雄千里飛艍一炬紅
霸業盡歸煙燼裏江聲長在月明中
我我赤壁涵朝日浩浩滄波颺晚風
古往今來幾多恨披圖吟處思無窮

唐子華小景

唐侯宰邑甚清閒
公退揮毫便寫山
共詫聲名滿天下
豈知圖畫遍人間
雲連古木迷青嶂
月照寒蘆漾碧灣
殘墨斷縑誰解惜
草堂披玩自怡顏

黃山

程孟

秀出層穹翠欲隤
栖霞宿霧似蓬萊
松搖陰壑生靈籟
泉噴深潭吼怒雷
峯頂煙銷丹竈冷
崖前風暖碧桃開
五雲深處羣仙集
白鶴青鸞定往來

野興

汪敬

澗壑穿幽路
仄歌梅花關
外水通陂背
人好鳥啼深
竹抱子驚猿
過別枝雨歇
黃流新漲急
雲交青壁亂
峯移釣絲不
掛非熊夢一
任長虹百尺
垂

淮陰侯

許身良犬失
熊羆百戰功
成亦自危智
數如君難免
戮英雄自古
易生疑真王
印在風雲散
大將臺荒草
樹悲莫恨當
時蕭相國幾
人回首見幾
遲

壽藏為汪思敬題

蘇景元

植山風景似仙源
流水桃花繞壽園
固穴不燒銅作槨
窮泉還鑿石為門
誌銘鐫就留年月
松柏栽成遺子孫
誰謂賢愚同一致
箇中別是一乾坤

寄書坊劉剡

女媧補後見神功
千里相思寄便鴻
斷簡殘編無日了
清尊明月幾時同
坐間有客常談項
天上何人復薦雄
一度登樓一惆悵
小山秋冷桂叢叢

奉和尚書程公征南獻捷

鐃吹歌成紀武功
一輪紅日照丹衷
風雷震處狼山碎
巢穴空時虎旅雄
九伐嘉謀今秉鉞
七擒英畧再聞風
劍南梟獍咸歸化
從此無憂到聖躬

一掃腥羶似燎毛
捷書頻奏詔頻褒
漢兵總跨新降馬
蠻血從殷舊戰袍
旗影夜翻瀘水淨
劍光寒射雪山高
當今天子多神武
況有元臣熟豹韜

環佩重來軒

宋丞相程公元鳳居歛槐塘有琴曰環佩亡去已久六世孫文實復

購得之為軒以藏
加扁重來二字

江瓏生

丞相宮牆何處尋老槐
紆繞翠沉沉鈞衡已輔當時政
環佩猶傳奕世音
六葉喜聞歸舊物
千鈞何足詫遺金
南薰古意人知少
好在雲仍繼此心

萬山西爽軒望黃山

張達

奇峰六六競巔岼
向晚憑闌最好看
秀出楚吳千里迥
翠摩星月九霄寒
古潭雷迅蒼龍起
仙洞雲深白鶴還
何日捫蘿登絕頂
擬從軒后覓金丹

蘿山清隱為汪世祥題

孫陽

小築茅堂傍翠微
花畦蔬圃澹相宜
看耕每到龐公宅
對酒惟吟楚客詞
春暖藥苗穿土早
天寒雞唱出林遲
松風蘿月長如昨
肯信功名鬢易絲

新安文獻志卷五十五上

欽定四庫全書

新安文獻志卷五十五下 明 程敏政 撰

排律五言

山中寄吳蟠十韻

方 干

莫問終休否林中事已成盤飧憐火種歲計付刀耕
掬水皆花氣聽松似雨聲書空翹足卧避險側身行
果傍閒軒落蒲連濕岸生禪僧知見理妻子笑無名
更擬教詩苦何曾待酒清石溪魚不大月樹鵲多驚砌下連樵

路窗間見縣城雲山任重疊難隔故交情

龜山上方

汪藻

度險逢幽處憑高寫壯懷連甍棲絕壁孤塔表長淮地
本吳封接山今禹跡階潮聲從殷寺竹影自翻堦木杪
朱欄出城坳雪浪埋乾坤迷枉渚霧雨洩陰崖丹葉經
寒在滄洲向晚佳魚龍宵聽唄猿鳥晝窺齋月滿蠙珠
實霜清磬石諧僧盃收栢子樵徑掃松釵左宦書無鴈
南烹菜有鮭風煙欺短髮雲水信殘骸竟作何鄉老虛

慚素尚乖江湖今在眼歸合辦青鞋

予以年事漸高氣海不能熱生暖冷旅中又無
藥物遂用火攻之策灼艾凡二百壯吟呻之際

得詩二十韻

朱 弁

不作漳濱卧年侵血氣衰據鞍思少壯攬鏡嘆清羸有
病方求艾無營莫問著心知出下策理勝遇中醫陽燧
神逾速銅仙術盡施論功鄙炮製取穴辨毫釐火帝恩
光異炎宮績用奇書螢比差似珠蟻迫方知忖物嗟炮

鼈觀形笑灼龜煙微初炙手氣烈漸鑽皮閉目書徒展
支頭枕屢移發狂還自哂賈勇僅能支宋鷁追風日吳
牛喘月時忠言勞緩頰善諶為開眉鍊氣工夫遠燒丹
歲月遲衛生防後患伐性釋前疑展轉那成夢呻吟且
當詩因心念民瘼出位嘆身卑欲已七年病當從百世
師保身將保德未可廢箴規

九日與數客登善福院之絕頂晚飲茗飲閣予
以病先歸賦十二韻

朱 擇

風日迫佳節一川秋意昏臨高分石磴却立數煙村楚
製隨雲物蠻花照酒痕龍山嗟未久藍水想空存鴻鴈
頻收淚茱萸幾斷魂拍肩尋熟路登閣喚餘尊鍾梵規
繩闊親朋笑語溫加籩攜海嶠聞笛憶鄉園夢記南柯
守兵看左角奔詩凡羞晉宋髮短任乾坤汝輩禪心起
今生道眼渾不知東嶂外灩灩湧金盆

紹興辛亥歲遷居星洲述懷 朱 權

別墅今為宅芳洲古號星一溪縈似帶羣岫列如屏繚

繞蟠龍勢迴旋翥鳳形紫峰鍾美瑞秀麓炳神靈峻嶺
通山去寒潭對剎渟高巖雙傑出斜谷獨深局鷗鷺遵
幽渚牛羊散遠汀春花紛外野秋月可中庭築室歌鴻
鴈謀隣詠鵲鷦來居猶未久補弊不遑寧愛竹留新笋
看松養茯苓採山收美茹釣水得鮮鯖漿短親諸子窗
明勘六經桂香思壁水槐影記楓庭事業姑藏器功名
會發銅豈無牙父志當遇子期聽鵬鶚須逢運驂駟豈
戀垌祇今時合待拄笏謾名亭

乙亥避地橫槎山中

汪宗臣

仙槎移到此杳杳白雲根石乳漏崖響山腰界雨昏徑
幽盤過險橋斷涉驚渾百匝回峯曲數家臨水村芋瓜
青繞屋桑柘綠當門鷓突兒迎客龍鍾叟抱孫澗春分
注沼田穫半樊園地僻衣巾古人稀耕鑿溫尚懷文杏
館且擬小桃源嶺外風波別搖頭勿復言

酬趙隱君還予詩藁之作因來韻增至二十四
用柳子厚同劉院長言懷事詩例也

孫巖

度德宜滕長論交墮魯臯淒涼當歲晚瀟灑見時髦常
恐詩無證空知調欲高扶踈纔社櫟變化豈胥濤濶畧
三冬學增多一字褒大篇參往錄異事詫吾曹昔嗜梁
臺選仍耽郢士騷長歌落澗谷中夜駭猿猱攻苦鵲濡
翼求朋鹿食蒿家無彥弘在鄉失呂溫豪擊拊當誰聽
荒蕪尚自薳英英善和柳皎皎義熙陶步驟才難至圖
回首屢搔較深搜石髓務潔取溪毛推激吾非黨譏訶

物得逃辭連盤谷稼想到武陵桃
朝逮虞淵暗宵幾鷗
旦噉含愁全庾賦寓樂間莊濠
不謂塵明鏡何殊贈佩
刀音書無鴈往時序迫蟬號嵇
向諸人遠周雷再世遭
未應求善賈孰不飲醇醪並席
葭依玉清言輟灸膏斯
期方緬邈北望寸心勞

詠友人竹

汪炎昶

拂雲何日種瀟灑傍茅堂翠重
煙分渭痕乾淚染湘塹
鞭枝倒發徑篠笋斜行地紫根
相絡莖高籜漸長山僧

冬覓種隣叟夏偷涼泛戶陰開闔掀風勢簸揚杖侵鏗
瘦玉爪刮聚浮霜禽踏枝毳屋松添影壓牆蕭韶如不
棄或可佐宮商

贈雲屋瑞上人

俗姓姚舊殿
前指揮使

方回

名緇今已絕見汝忽驚神昔日陪三衛多年護九宸漫
從難幘報長與蠹編親漢幄垂前箸秦關痛隻輪驟驚
淪寶玉何惜褫冠巾往事憐蝸國餘生脫鴈臣片雲聊
作屋死樹自觀身空鉢寧無食枵囊別有珍跣行千里

近凍卧八寒春像喜圖佳士名虛徹貴人論詩色涇渭
遠俗意參辰餘子一時盡高流百世新公能追慧遠吾
或可遺民剝櫛雖殊相澄江月共真

呂氏澧溪八景圖

程文

盡道澧溪好澧溪景若何重樓上雲水比屋入煙蘿長
笑天風迴清吟地籟和水深陂窈窕路曲嶺蒐莪鳳舞
風中羽龍騰雨後梭近堤鳴牧笛遙野辨農蓂紅亞桃
歌竹青披柳蔭荷松雲迷後塢梅月澹前坡縵汲垂虹

井機春浴鷺渦廟燈山鬼伏橋鼓社神呵返照懸紅樹
奔泉響玉珂吾伊碧窗讀款乃紫崖歌冠佩才華盛鄉
隣禮數那人喧朝集市仙過夜飛柯山勢遙通蜀川流
近走番丹霞接方丈白鳥向新羅俗美民偏樂官清政
不苛馬嘶行旅道鶯語碩人邁風物千年勝標題八景
訛請攜靈運屐暇日數來過

豫章南樓

汪廣洋

適意緣清景馳思屬早秋春馬臨勝地暫爾憩南樓楚

岫雲中出章江樹杪流涼蟬泛聲響細草沒歸愁鼓角
三邊壯襜褕五月留誰知放歌者脉脉寄滄洲

送蔡參政入蜀

詹書

東吳霖雨佐西蜀將星明水落黃牛廟雲開白帝城邦
交修玉帛賓禮會簪纓陸賈無裝贈揚雄有賦名詞源
流峽水詩筆發天聲叩竹臨風看巴船載雪行錦官談
舊俗金節促歸程聖主龍顏望慈親白髮生鳳池邀閣
老馬首出郊迎

寄吳朝錫

小樓殘燭短冠佩候晨鐘紫陌嘶羣驥丹霄駕六龍朝
回尋藥裏病起寫書封歲月驚華髮松楸動慘容春雲
懷去友夜雨夢歸農淮海經年別何時得爾從

聞吳繼新寫正覽畢作詩迎之

唐桂芳

吳郎久不見悵望隔江村辛苦頭將白編摩眼易昏蕉
心含雨潤柿葉纈霜繁智永瞠諸後義之本一門未應

梁上得偏向枕中存點磔臨池墨戈波漏屋痕
縈縈蛛結網裊裊蠶繅盆白練書裙好黃麻草
詔尊首濡無醉魄筆諫有忠魂安得三千幅煩
君恣意繡

排律七言

許員外新陽別墅

方干

蘭汀橘島暎亭臺不是經心即手栽滿閣白雲
隨雨去一池寒月逐潮來小松出屋和巢長新
徑通橋避笋開柳葉風中歌枕臥荷花香裏釣
魚回園中認藥分靈草

簷下攀枝落野梅，莫恣高情求逸興。
須防急詔用賢才，若因螢火終殘卷。
便把漁歌送幾盃，多謝郢中賢太守。
常時談笑許趨陪。

李侍御上盧別業

滿目庭臺嘉木繁，燕蟬吟語不為喧。
晝潮勢急吞諸島，暑雨聲回露半村。
直為援毫方掩卷，常因按曲便開尊。
若將明月為儔侶，應把清風遺子孫。
繡羽驚弓離果上，紅鱗見餌出蒲根。
尋君未要先題竹，且擢漁舟入大門。

問政山留題

黃田

千尋練帶新安水萬仞花屏問政山自少雲霞居物外
不多塵土到人間壺懸仙島吞丹罷椀浸星宮沉水閒
寶籙篋垂金縷帶絳囊條鎖玉連環靜張棋勢鋪還打
默考仙經補又刪林並葛鞋雙兔伏窗橫櫪几老龍跼
溪童乞火朝敲竹山鬼聽琴夜撼櫟草暗碧潭思句曲
松昏紫氣度函關龜成淺甲毛猶綠鶴化幽翎頂更殷
阮洞神仙分藥去蔡家兄弟寄書還黃精苗倒眠青鹿

紅杏枝低挂白鵬容易煎茶供客用辛勤栽果與猿攀
常尋靈穴通三島擬過流沙化百蠻新隱漸開侵月窟
舊林猶恍枕沙灣手疏俗禮慵非傲肘護靈方臂不慳
海上使頻青鳥黯篋中藏久白驢頑筇枝健拄菖蒲節
笋櫛高簪越帽斑花氣薰心香馥馥澗聲泠耳響潺潺
高墳自掩浮生骨短晷難窮不死顏早晚重逢蕭塢客
願隨芝蓋出塵寰

羅鄂州志載詩史云欽州問政山聳師道真人所居常有人涉險攀蘿至

絕壁於巖下嵌空處見詩一首雖苔蘚昏蝕文尚可辨即此篇也

登凌歊臺

程俱

凌歊正在塵歊外四起雲山翠欲浮丹檻昔時空勝事
錦袍何處想靈遊鰲分一島來平野鯨吸長江帶兩州
手抉飛雲天作幕坐侵寒露月垂鉤向來時有千巖夢
對此渾銷萬古愁醉目歸鴻天際沒地高空濶更宜秋

監邑八公即席索賦武功詩 吳訥

塞旗南破犬羊羣威武聲名到處聞能以奇兵攻必取
不憂強賊聚還分煙村古渡新酣戰昱嶺重關舊策勳

幾度彎弓動明月三回舞劍斷行雲經營河北思劉秀
割據湖南笑馬殷今日休陽誰克復傍人爭道八將軍

題休邑程士原率濱亭

呂旭

仙翁亭構今何在肯構憐君復舊撫在昔故基仍勝絕
于今喬木尚榮敷翰林題扁輝聯壁朝野留詩耿貫珠
五柳孤松彭澤里黃鸝白鷺輞川圖溪毛落雨青絲長
石髮凝烟翠錦鋪晴日漾波鳧對浴涼風吹樹鳥相呼
笑談欸欸留賓客燕處怡怡樂友于琴響嶧桐調鳳尾

簾疎湘竹捲鰕鬚何時緩策從幽討莫惜郛筒滿眼沾

題醫士朱士良紫陽讀書卷 唐文鳳

流水淙淙撼石梁紫陽當戶挹嵐光何殊講習居長白
自說流傳屬太倉藥品君臣儲滿籠書籤今古積連牀
螢囊照眼能供讀龍化為人欲問方坐愛茅簷隨月色
病思橘井涌泉香良醫良相真何異好拯生民濟世康

新安文獻志卷五十五下

欽定四庫全書

新安文獻志卷五十六

明程敏政撰

絕句五言

無題

許宣平

負薪朝出賣酤酒日西歸借問家何處穿雲入翠微

北窗

汪藻

睡起無一事怡然盼庭柯綠陰微缺處最得南颺多

繡谷亭

西山屬黃岡相錯宛如繡倚杖立幽亭歸鴻沒煙岫

書壽昌驛

程俱

歲暮白日速風高黃葉稀歸心與寒鴈一夜向南飛

懷劉園

朱松

一與劉園別春風到海隅牆陰草爭綠留得屐痕無

五言

散策橋南路春容最好時夢回花滿眼猶恐是辛夷

書趙園壁

朱擇

夜月閩盃淺春風楚製輕故鄉空費夢來此聽溪聲

劉德明宴集祝第以夏雲多奇峯為韻賦詩戲

成五絕

朱熹

出山幾何時歸來便長夏端居心不怡散策長林下
為客厭城市還家辭世紛朝昏何所見但有四山雲
閉門事幽討歲月忽已多客來無可問與君共絃歌
干時本已懶宵次況亡奇若問中林趣婆婆祇自知
炎蒸不可奈雲氣滿前峯向夕風吹盡微聞遠寺鐘

和人感秋韻八首

程先

短景迫山陽愁多尚覺長一聲蘆葉響萬里塞雲黃

日秋

征魂猶未返素魄為誰明夢入蕭關去西隣絡緯鳴

月秋

疾風拔枯楠天作破瓦色古殿無飛塵過者見瑟瑟

風秋

金瘡怯秋氣謫戍未終更滴滴思鄉淚飛空作雨聲

雨秋

憶昔遊吳甸新知結項容松江楓落後貌得洞庭峯

山秋

奔湍激哀玉動影漾寒金八月西興浪千年伍子心

水秋

上下青銅炯中間著我宜曾將根斲斷怪石似玻璃

雲秋

多情門外草與我共飄零腐化猶相戀將衣點作螢

秋草

自南齋晚歸二首

王炎

返照南山脚西風古渡頭破煙雙鷺晚抱葉一蟬秋
溪涼魚撥撥山靜鳥飛飛草笠兒驅犢荆釵女浣衣

秋崖

方岳

鑿空為此名忽已落衆口聊結一間茅承當作崖叟

山徑

一徑淨於秋山中夜來雨倚松不知還幽禽妙言語

隔牆梅

寂寂度年光，堅貞玉雪香。
冶容誰氏子，終日傍垂楊。

萱

憶被萊子服，種汝奉高堂。
汝自忘憂爾，吾憂未易忘。

杏

馬令園中本移來，村墅中太官今却獻。
黃帕不來封。

詠史二十二首

趙戣

聖德光天下，歲功成閏餘。
百篇推帝典，一半是農書。

唐堯

遜跡陶漁久論功納麓多已傳精一語更作勅天歌

虞舜

地已還三壤曩方次九疇基圖天與子典則我貽謀

禹夏

罪已桑林六仁心祝網三只應寬代虐何事德懷慚

湯商

大邑周新造曾孫武始王伯夷方馬諫尚父已鷹揚

周武

萬世家為國長城山作圍試憑驪岫望秦鹿幾年肥

秦始

皇

真主乘昌運假王恢雋功如何亡賴子失笑未央宮

漢高

祖

意豁高皇似雄才大敵推萬方瞻日角列宿粲雲臺

漢光

武

橫槊真名將燃萁亦忍人大君時有命雅意俗還淳

魏文

帝

犬噬憂方重羊車意轉深可憐司馬國又屬問蟬人

晉武

帝

馬浮雖是識牛繼亦殊聞昔者車書共天乎南北分

晉元

帝

已拓三秦地寧無幾月留登城聊北望老淚不勝流

宋武

帝

戡難功何補欺孤計已深儘饒推導玉那解賤黃金

齊高

祖

玉陛尊梁帝金園號誌公聞經同泰寺索蜜淨居宮

梁武

帝

清淨方貽笑莊嚴更舍身基圖雖肇始識趣只庸人

陳武

帝

猛上臨光殿生擒歸命侯師心無學術與子失貽謀隋文

帝

唐室恢新造秦王有大功一人居北極太子在東宮

唐高

祖

未必黃明在終令丑口亡難教疎網漏不直敗羶藏

後梁

祖太

刺心真有志批頰更何為試問唐新主何如亞子時

後唐

宗莊

尊以父皇帝賂之十六州終無噉飯所誰不石郎羞

後晉

高祖

不假契丹力踢翻麥飯盃試看龍衮畔還有雀兒無

後漢

高祖

坤輿聊底定鼎祚又更新五代無真主世宗差可人

後周

太祖

晚步即事

錢時

晚行叢竹下羣雀忽驚飛一笑為回首拈花上翠微

治菊

菊本秋風盛
芟除勿厭難
寒煙衰草地
正要得花看

安溪午睡

禾黍秋將近
溪山日自長
午窗千嶂雨
幽夢一簾香

開窗

汪若楫

草色侵書綠
依山多得陰
月高猿挂樹
驚起夜棲禽

半山寺

汪宗臣

往事空求佛
當年誤買隣
悠悠思舐犢
煙雨暗松筠

沖陶山中

侵牀綠意多過牖松花落草堂一編詩送客不下閣

還鄧覺民詩卷

孫嵩

南山竹可笛北山桐可琴得如聽松風中有太古音

閱秦紀二首

初逃堪未亡又遇朴無傷如何博浪禍更使副車當
秦獄聊逃雨湘山偶阻風伐樹仍封樹元無罪與功

邵康節

真隱由中土行窩賞太平生無皺眉事單為杜鵑聲

山間

孫巖

谷鳥鳴聲滑山雲變態新清渠不沒脰亦有浣紗人

武林絕句二首

繽紛迎酒伎宛轉賣花聲偶似承平世攜書試鳳城
比屋單衣日名城冷食天居人多上塚遠客未歸田

秋晚園中二首

籬落圍秋色株梢冒晚暉菊花供麴盡桐葉飼魚稀

風葉相仍下家童未埽除
綿聯封蟄戶殘缺帶蟲書

竹徑

汪炎昶

竹陰清入骨消得此閒行
不待鋤蒼蘚頻來徑自成

晚春客愁四絕

方回

江外蘆芽老城中柳絮飛春風猶幾日
誰與濯征衣
春老魚苗動江肥雪水來大孤山下路
何日汎舟迴
思歸歸未得悔醉醉還頻不料湓江上
題詩送晚春
十載干戈後辛勤蒔牡丹豈知身是客
借與別人看

出城

久病欣初愈長忙愛暫閒出城因送客沿路得看山

渡江至儀真口占四首

汪夢斗

風冷知日落水寬得天多金陵懷古句絕唱是西河
寒波白似面遠岫劣於眉江上無多作淮南正要詩
事以詩書立國惟仁義昌當年衣帶水元不管興亡
風順帆心飽潮平櫂未收擁書人自卧一息到真州

新徑

江砢

便可行松影尤宜坐竹風隣家呼酒近來往水聲中

小澗

悠悠浮竹影細細響松根千丈寒光遠如蛇曲度村

晚行

樹暗催歸鷺村遙認渡牛夕陽收欲盡策杖過荒洲

新竹

忍口留牆笋柔枝散薄陰晚來攜短杖便有歲寒心

夏末雨後

雨氣侵衣潤林花照酒新
勢塵無一點斜日淡隨人

夜雪初霽

枕上聲初斷開窗玉作林
浮雲歸已盡明月挂天心

早夏思家

綠樹鶯呼夢渾疑在故園
家人占鵲喜笋已出離繁

昭君怨

萬里勞邊算堪嗟孤冢青
君王何不悟咫尺是宮庭

方虛

谷云石卿詩他人千言欲以數語十步而近折旋二三能簡又能委曲一奇也古韞詩律皆氣動律嚴又一奇

也

早起

唐元

出郭星垂野穿林露濕裘風高猶過鴈月黑有行舟

五言

鏤巧太湖石舁來動百枝蒼黃識新主臺榭總相宜

夜坐偶成因憶吳會舊遊

書燈鑒永夜推枕即窗明却喜還家夢經旬不到城

班姬題扇

婉孌儒家女淒涼團扇詩情知辭輦日花嚙笑成癡

可湘

胡初翁

石罅瀉蒼乳泠泠玉泉清我纓本無塵戲濯秋月明

杭州黃鶴山亭

汪莊

山亭度晚秋寢衣覆新凍松子落虛簷幽聲入殘夢

灘行五首

汪廣洋

花底住鳴鞭曉行灘上船上流風較穩百尺不須牽

上峽灘水急下峽灘水清隣船夜相語兩日到嚴陵

聞道沙溪酒春來如蜜香
買將千百斛取醉到東陽
灘上水平沙拔舟蕩落花
吳儂不相識對面浣春紗
三百六十灘相逢相見灣
舟師憐遠客數問幾時還

過吳城山

夜過吳城下不眠閒倚窗
遡流雙櫓健揺月下西江

隣翁

趙訪

世亂人心薄年荒虎跡多
隣翁近相戒日暮少經過

山居雜興

鄭潛

牆頭桑椹落樹上春鳩鳴獨立衡門晚滿川雲氣生

題績溪石鏡山

曹遷

石鏡照妍惡火焚光不磨丈夫心地險莫向此中過相傳

黃巢過此照見猴形縱火焚之不晦

奉題友章程先生文堂二詠 呂旭

飛龍何蜿蜒積翠光欲滴金烏浴扶桑影射半山赤右飛

龍曉

日

輕雲翳西峯釀作晚來雨涼風吹不開絲絲墮銀縷右西

岑暮

雨

書所見二首

朱原貞

雨過千峯淨
泉飛萬壑鳴
溪流崖下險
人杖樹邊行
樹大環居靜
山昂曲徑低
花飄風逐北
橋正水流西

夷齊

蘇景元

一死須臾事
西山直到今
紛紛肉食者
誰識采薇心

絕句六言

泊舟儀真江上連日風雨

程俱

沟沟風號萬竅冥冥雨暗長江午夢歸尋三徑南山恰
對書窗

折山道中二首

朱擇

雲暖網橫危磴日沉舟泊平沙欸乃一聲歸去炊煙遙
起蘆花

牛卧黃茅岡底鷺歸紅葉村邊可是太平無象溪橋醉
舞華顛

萬州湖灘六言

查籥

滿目暮山平遠一池雲錦清酣忽有鐘聲林際直疑夢
到江南

舒嘯

王炎

幽人獨坐空谷最愛夜深月明雲外一聲長嘯四山木
偃風生

答慈湖先生

錢時

籬下黃花燦燦庭前新月娟娟獨立西風無語一行鴈
字書天

演雅

汪韶

布穀不耕不耜巧婦無褐無衣提壺不可挹酒絡緯寧
來貿絲

螺贏堯舜父子鴻鴈魯衛弟兄鬪蟻膝薛爭長狎鷗晉

鄭尋盟

劉後村嘗
稱此二絕

新秋池上曉望

汪宗臣

淨植香來水北殘蟬聲度橋東清泚金鱗漾綠夕陽白

鷺翻紅

六言二首

汪炎昶

撼竹露喧餘滴度荷風挾微香醉袂拂開雲影釣絲牽
動潭光

暮雨帶雲淒澀歸時不脫漁蓑隣犬誤疑客至數聲吠
出煙蘿

即事呈龔子敬二首

唐元

彈冠而仕已老刺船以嬉若人文字稗官野史冠童舞
雩暮春

未聞一飯三矢尚可斗酒百篇摘領到無可白著書何
有於玄

山行

汪廣洋

溪光靜如白練山色碧似朝霞最是一春好處雨晴人
采新茶

讌會清堂

勝日大開東閣臨池旋取鮮鱗只為梅花合醉不須風
雨留人

學書

趙訪

玩物謹防喪志游藝貴後依仁但可時時適意不須咄咄逼人

山中

鄭潛

春雪白如鶴翥晚山青若龍蟠高軒有客拄笏神武何人挂冠

對月

陳鑒

意倦愛眠高枕量慳怕飲深杯夜靜不須閉戶放教明

月歸來

吳華六言

江敬弘

春水深浮鴨綠曉山高聳螺青散子魚潛荇穴抱琴人
往蕪汀

門掩蒼苔綠竹路通白磔青山幾處蟬鳴日永坐看林
鷗暮還

絕句七言

君不來

方干

遠路東西欲問誰寒來無處寄寒衣去時初種庭前樹
樹已勝巢人未歸

東陽道中作

百花香氣傍人行花底垂鞭日易曛野火不知寒食節
穿林轉壑自燒雲

夜會鄭氏昆季林亭

捲簾圓月照方塘坐久尊前竹又霜白犬吠風吹鴈起
猶能一一旋成行

陳州寺中聞太守肆射作

丘濬

殿宇閒閒燕雀鳴，虛庭盡日少人行。
孤吟獨坐情何限，

時喜風傳中鵠聲。

吟窗雜錄云：道源年十歲在陳州聞太守寺中肆射賦此。太守大異之。

春日 和呂本中

汪革

宴坐黌堂一事無，居官蕭散似相如。
偶違濁酒風前約，

不見繁英雨後疎。

見紫薇詩話

題靜江府枕流亭

胡舜陟

平生壯志在燕然，投老南征未息肩。
鼉鼠發機端可笑，

暫休戎馬弄潺湲

宿鄴侯鎮一

汪藻

當時踏月此長亭
鬢似河堤柳色青
今日重來堤樹老
一簪華髮戴寒星

二

微涼初破候蟲秋
露草螢光已不流
搔首與誰論往事
星河無語下城頭

雜興一

晨起翛然曳杖行一簾踈雨作秋清老來歲月能多少
看得栽花結子成

二

燕子年年入戶飛向人無是亦無非來春強健還相見
送汝將雛又一歸

相如

詞氣縱橫亦壯夫低回功業獨何如可憐封禪遺忠意
魂魄應須愧史魚

三峯草堂

程俱

庭前雙梧一畝陰
禪房蕭森花木深
清霜葉落空山響
夢覺寒窗松月林

得叔問書報柳元禮許寄鶴

海上胎禽雪翅翎
故人千里念巖扃
崇蘭館近仙音塢
為子新添放鶴亭

數日江上頗有春色偶成遣興

遠樹參差數點煙
目窮天際水黏天
背人葉葉風帆去

應有鴟夷萬里船

笋

朱松

春風吹起穉龍兒戢戢滿山人未知急喚蒼頭斲煙雨

明朝吹作碧參差

曾氏端伯曰朱吏部喬年儒學決科刻苦為詩紹興初綦處厚為翰林學

士每哦其詩最愛此絕蓋前人有笋詩曰急忙喫著不可遲一夜南風變成竹喬年點化乃爾精巧處厚力薦于朝後為尚書郎

冬乾

陌上冬乾泣老農天留甘雨付春工阿香急試雷霆手

莫放人間有卧龍

南浦

苟祿勞生不為身強顏來此算征人莫將朝市輕分別
等是低回一闕塵

洗兒

即文公也

行年已合識頭顱舊學屠龍意轉疎有子添丁助征戍
肯令辛苦更冠儒

延平道中

朱擇

一溪春漲午晴初日透波光綠浸裾却憶孤山山下路
石橋清澈看叉魚

舟次黿湖阻水因由董山一

山雨踈踈心又驚起瞻天色斗微明他年一枕江關夢
知憶蓬窗此夜聲

二

一川黃濁瀉崑崙苦恨南溪不盡吞三老亦知行意速
時時插竹記沙痕

杼峯

汪勃

夏后峯前思盛業魯公亭畔憶孤忠
吳興勝地東南會
震澤嵎山在眼中

程倅春行

汪若容

綠楊芳草正留連
急雨催詩濕錦韉
野老不知行樂意
背人無語自耕田

茗溪漁隱

見詩人
玉屑

胡仔

溪邊短短長長柳
波上來來去去船
鷗鳥近人渾不畏

一雙飛下鏡中天

二

秋雲漠漠煙蒼蒼蓮花初白蓮葉黃釣船盡日來往處
南村北村杭稻香

三

捲起綸竿撒釣歸短篷斜掩宿漁磯日高春睡無人喚
繚亂楊花繞夢飛

曉步

李縉

曉步閒隨蛺蝶行
村南村北雨新晴
山花野草自幽意
布穀一聲春水生

送德和弟歸婺源一

朱熹

十舍辛勤逐熱來
琴書曾未拂塵埃
秋風何事催歸興
步出閩山黃葉堆

二

十年寂寞抱遺經
聖路悠悠不計程
誤子南來却空去
但將迂論送長征

贈內弟程允夫

見紫陽遺文

外家人物有吾子我乃平生見未嘗文字只今多可喜
江湖他日莫相忘

二

故家歸來雲樹長向來辛苦夢家鄉行藏正爾未堅決
又見春風登俊良

三

我憶當年諸老翁經綸事業久參同只今零落三星曉

未厭棲遲一畝宮

寄江文卿劉叔通

我窮初不為能詩笑殺吹竽濫得癡莫向人前浪分雪

世間真偽有誰知

自注云僕不能詩往年為澹菴胡公以此論薦平生僥倖多類此

冬近

程大昌

世間剝復每相乘此理幾幾喚得磨萬木凍僵梅有信
黃河水合氣如蒸

息齋

羅願

世間誰號最閒忙
強健收身意自涼
春去掃花時汲井
客來剪韭旋炊粱

寓郡城夜熱不可寐

吳儆

淡月微雲對倚樓
無聲河漢自西流
高城忽起梅花弄

散作晴空萬里秋

呂竹坡云此篇詞意清新而豪氣勃勃不可遏宜與坡杜相周旋

白竹橋

程洵

向來過此日流金
今日重來雪滿林
輕棄簞瓢貪斗粟
區區奔走媿初心

題耕隱卷

程永奇

山下巢雲夢亦清
隴頭耕雨綠蓑輕
時人共指龐居士
為借農書一到城

晚浴溪上

王炎

山脚草深樵徑沒
溪頭水落石梁高
一川風露無人占
古柳玄蟬處處號

郊外見梅

四山有雪未全融
蓓蕾梢頭茁小紅
也欲索花同一笑

蒼顏羞澀見春風

二

故園踈竹閉柴關
手植孤根在竹間
別後踈枝無恙否
寂寥風月冷溪山

聞蟬

綠陰遮日忽鳴蟬
墮地殘紅色未蔫
兩岸垂楊低蘸水
夢魂時到故溪邊

豐年謠

稻如馬尾覆溝塍桑柘陰中一犬鳴
收穫登場便無事
輸租人不到州城

子陵祠下作

汪義榮

四皓逃秦終翼惠伯夷避紂亦歸文
先生豈是忘君者
最有維持漢鼎勲

宿平江寺

汪儀鳳

行盡江東又復西連天汀草淡煙迷
回頭悵望家何處
雲外青山一抹低

題豐城驛

過盡長亭復短亭
脩途隨處月同行
明朝買得扁舟去
兩岸蘆花夾櫓聲

絕句

金良之

秧針刺水麥鋒齊
漠漠平沙白鷺飛
莫道春光已歸去
清香猶有野薔薇

陳時柏

程秘

陳未亡時柏已蒼
風來歷歷說興亡
世臣元不如喬木

閱盡中原幾戰場

早入

紫薇浥露翠條深
捷靈烏振好音
全似冰巖亭上坐
四屏煙靄奏春禽

立春都堂受誓祭九宮壇

方岳

輦路春融雪未乾
雞人初唱五更寒
瓊幡第一番花信
吹上東皇太一壇

農謠

問舍求田計未成一蓑鋤月每含情春山樹暖鶯相覓
曉隴雨晴人獨耕

清明日舟次吳門

蓬窗恰受夕陽明楊柳梨花半月程老去不知寒食近
一篙煙水載春行

聞雪

黃塵沒馬長安道殘酒初醒雪打窗客子慣眠蘆葦岸
夢成孤棹涉寒江

梅花

竹遶疎籬水遶村一枝無語更黃昏
暗香似識騷人意
月淡無風自入門

和人淵明采菊圖

趙幾

淵明為米腰慵折送酒人來却強顏
今日東籬重采菊
只應醒眼對南山

與客步月坐澗中石上

錢時

林逼山深一罅天
臨流趺坐月娟娟
此時妙旨誰能領

遶石琅琅走澗泉

登天寧塔象山先生舊嘗題名其上

孤塔危闌倚碧空山川城郭一襟風象山遺墨今何許

老木蕭蕭夕照紅

無題

臨池綠樹陰陰合入竹黃花顆顆新世外別無安樂國
寰中真有太平人

江東報英烈擬封二字侯

錢氏兄弟曰愚嘗宋南渡起鄉兵禦金烏

珠於嚴州以功立
廟賜額曰英烈

烽塵明越連焦土海道溫台暫翠華西遡濤江謀守國
不知豪傑起山家

記花頭巡檢及孝女鄉

花頭巡檢先君紀之詳矣孝女鄉孝女騎虎以

救親今山巖下有孝女石即其處也鄉之得名以此然則南鄉舊名忠鄉梅坑舊名女坑俱當仍舊不可改也吾鄉有此二事宜廟而德之以表勵風俗因成一絕道予所志云

花頭巡檢罵賊死蓬首女兒騎虎號安得邦人百世祀
魏魏忠孝比顏曹

夜坐

汪若楫

鑪煨榼杌煙容冷酒瀉茅柴春色輕
夜坐不眠人悄悄
梅梢隨月繞窗行

久雨

連連春雨幾黃昏
溪岸人家水近門
借問人家水曾落
竹林枝上看泥痕

門前松棚

突兀山邊屋數間
每嫌斜照上闌干
當門只得添松蓋

未到秋來夜已寒

秋

萬木驚秋各自殘
蛩聲扶砌訴新寒
西風不是吹黃落
要放青山與客看

欽定四庫全書

卷五十六

新安文獻志卷五十六

欽定四庫全書

新安文獻志卷五十七

明程敏政撰

絕句七言

吟蛩

許月卿

吟蛩不管興亡事
舞蝶那分夢覺身
別浦連檣歸遠客
高山小徑過樵人

白雪

白雪家家拆蠶箔
清風習習入秧苗
半開猶蘂花情遠

久雨初晴鳥弄嬌

朗湖道中

屋下種花簷露滿
窻前疊石岫雲生
春風不解分疆界
本自無心却有情

首夏

首夏清和似夷惠
心情熙洽即唐虞
竹梢巧送月到牖
荷葉亂迎風入湖

金陵懷古

汪元岳

勝地尚存龍虎氣荒臺已失鳳凰蹤六朝文物山川古
霸業終歸指顧中

觀黃山仙人藥臼

程立信

藥臼空遺千載名丹成人向九天行我來欲覓刀圭劑
只聽寒泉佩玉聲

題荊公讀書堂

吳資深

六籍紛紛盡可奴翻騰字說乃苗畬可知山半青燈夜
只讀商君一卷書

孫武

汪韶

為憂玩色隳軍實故假陳兵去二姬却恨此機深莫悟

後人不諫受西施

劉後村云汪君示予行卷篇篇有意如評孫子斬二姬為防微庶乎今昔

人所未道者

林和靖墓

吳錫疇

遺藁曾無封禪文鶴歸何處認孤墳清風千載梅花共

說着梅花定說君

呂左史云此七言之奇者

送春

惆悵春歸自不禁日長門巷靜沉沉應知不止為花地
沃沃桑麻雨露深

山中雜言

小小柴門傍竹開幽深不慣有人來頗嫌老鶴無情思

啄損庭前一徑苔

方虛谷曰蘭皋詩淡靜幽深有賈浪仙之風

登金陵鍾山絕頂

吳龍翰

萬仞鍾山着屐登中原今隔幾峻嶒自憐不及天邊鴈
歲逐春風到八陵

草堂

蒼煙落日草堂深淺淺寒侵白玉簪等客不來童睡去

自搖脩竹和新吟

方虛谷云式賢嗜奇學博如此絕尤予所深喜者

十一月宿於潛

汪宗臣

蜂迷蜜甕木絲香蟻泛花甕碧玉漿縣僻人稀寒日晚
古松樛翠出危墻

燕鴈

秋來春去鴈賓熟秋去春來燕子忙寒暑自分人事信

不須禽類互炎涼

晚望

野岸松杉暝色沉
漁翁收釣碧潭深
衝雲點點鷺飛疾
何處呼牛尚遠林

春信

程徹

蕭條冬事堂堂去
拍塞韶光點點開
明月清風遮不斷
暗音時入夢中來

紫陽夜坐

孫嵩

一夜燈前白紵單
沉吟有此夏初寒
露零若與人相語
松杪瀟瀟下石壇

偶作

更勿窮通算此生
文章玄白付誰評
淒涼例薄佳人命
邂逅多成監子名

書雨

陰谷幽林熱似焚
阿香鳴鼓驟殷殷
天公作雨須臾事
用得東山一片雲

歸途旅思

虛市斜陽早掩門
蕭條州縣抵深村
殘梅與客迎新歲
明月隨人作上元

姑蘇元夕

茂苑長洲滿地春
吳兒歌舞逐時新
風流百巧花燈手
猶是夫差國裏人

初歸

孫巖

湖蹤海跡一飛蓬
千里常隨莽蕩風
今日抵家籬犬噪

不知身是主人翁

樹陰

春去空山啼乳鶯鶯邊老樹幕新青一瓢挂此坐終日
即是蘇家擇勝亭

溪上

溪翁生計獨熙然新買南隣舴艋船日載鸕鷀三十尾
魚為租入水為田

方虛谷云此絕類陳后山不具眼者不識也

寓齋

環中風物有誰爭即日詩情取次生
雲倦竟依簷際宿
雉馴時下竹根行

過往歲避地之所屋毀人遷
汪炎昶

依舊蒼苔小徑斜當時從此入山家
心疑謬誤還疑是
雨濕棠梨一樹花

晦菴先生遺墨

予先世凡兩娶朱氏一韋齋從姑一晦菴從妹至先大父僅存

先生四帖今幸存其二於吾宗感而有賦

久遠知誰更解珍即今猶見墨如新
難懷白壁歸秦國

尚喜烏號屬楚人

又

待制詩章雕玉雪郎中筆陣布雲霞獨於妙跡留遺恨

澗石嵯峨疊蘚花

待制呂廣問郎中凌唐佐皆靖康時人二公所贈先世詩今皆有石刻存

焉

湖堤雨中夜歸

方回

夜雨昏昏欲雪天數家燈火北山前鄉心認作桑麻路

忽有湖船奏管絃

行宮西門

翠華東幸締和盟從此君王罷北征宿衛周廬無處所
野人畦菜傍宮城

舟行青溪道中入歙一

乘時盜賊起風塵戰血苔痕幾度春古廟僅能存大樹
荒山猶自少行人

二

刺桐花發草如藍欲卸綿袍剪苧衫一夜春霜忽如雪

江南天氣不宜蠶

跋張明府獨樂園圖一

熙寧相住半山寺元祐人宗獨樂園早起菴中釣魚手
未應宣靖失中原

二

獨樂人聞新法新定應翻作獨愁人墓碑一仆黨碑立
已覺園花埋戰塵

題許宣平南山故居

自注云李白來訪許宣平
於紫陽山下過渡得破船

有老翁在問宣平家老翁指船篙賦詩曰面前
一竿竹便是許公家即宣平也二仙相遇甚奇

一菴依舊翠微中身在蓬萊第幾宮羽衛夜歸人不識

滿山松檜響清風

新晴

女伴新晴喜曬衣老人閒步覽春暉隔籬一樹桃花發
初見今年粉蝶飛

崇德道中

汪夢斗

忽憶西窗晝掩扉却緣殘照水邊歸杜陵夔府坡南海

都似西窗此夕暉

有感

驅馳萬里且歸休三十餘年只漫遊已死舒何叫不起

霜松雪桂一山秋

徽學近年惟舒公璘何公坦大有功於學夢斗在學時松桂甚茂今聞剪

伐矣

通倅陳弗齋部運歸自河南 曹涇

風月平分本是閒一車留汴獨間關了將官事歸來喜
識得宣和萬歲山

蔣山八功德水

鮑子壽

功德河沙七寶池可如甘露降三危鍾山一滴曹溪水
好及蕭郎索蜜時

維揚懷古

江北江南水一涯迷樓結綺兩堪悲雷塘草綠人安在
曾見黃奴坐井時

汪忠卿御史梅菴

程文海

家住新安生虎林繡衣風節老梅心客來若問封侯事

笑指菴前月色深

夏夜

汪雲龍

銀溪乍生秋入座
火輪初墜月侵廊
荷風翕翕傳綃扇
竹露蕭蕭下石牀

江南

趙象賢

鷗波萬里與天浮
煙樹微茫接幾州
底是客懷愁絕處
滿騷風雨倚江樓

偶題

杯羹瓶粟苦無多
剪爪侵膚可奈何
老矣未成禱杙史
歸歟不為虞庠歌

登徽城譙樓

江光啟

夕陽猶戀最高樓
天角銀蟾欲滿鉤
曲曲闌干渾倚遍
故園松菊幾分秋

曉村

葉朱

曉天風露冷飈飈
山下人家景絕幽
略約影橫門外水
遠籬開遍碧牽牛

幽居

朱燾

衡茅松底漫為家
竹引香泉淪瑞茶
落莫秋容誰管領
一堤霜蓼自紅花

見方虛谷後自述

程以南

清吟空想離騷國
至理難窮太極圖
知有老人圯下履
恨無鴻寶枕中書

鴈不傳書

吳先登

牧羝北海堅持節
射鴈上林那得書
但使子卿歸漢國

從教使者誑單于

山房偶書

孫國瑞

山深露重涼如許
落木蕭蕭積煙渚
西風慎莫剪芭蕉
留與幽人聽秋雨

題雲巖耕讀卷

程榮秀

侵曉耕田夜讀書
白雲深處結茅廬
紅塵不到蒼崖畔
自有漁樵問起居

贈言星易汪巖川

王儀

六籍分明易有神能逃烈火度羸秦說鈴傲几欺童稚
不似成都賣卜人

黔川雜詠

唐元

翠瑤為壁住人家一夜山前聽亂蛙莫怪客衾涼似水
淙淙飛澗隔窻紗

題陳生明皇洗馬圖

五龍毛骨代間無遠市邊城入帝都珍重君王賞神駿
內家別有洗兒圖

玉山道中

胡初翁

青山歷歷響春聲
十里秋雲一望平
倦客小支筇竹瘦
霜風煙草路縱橫

夜歸舟中

江上歸舟暮色蒼
市樓燈暎遠波光
樓中風蕩歌雲去
不浣漁家月下榔

藤溪古祠

汪稱隱

蒼松老檜鎖寒煙
古廟荒涼野水邊
門掩苔痕香火冷

石幡竿上嘯饑禽

長沙定王臺

鄭紹

當年米博長安土寧得負米歸長安王去何之母誰望
夜深明月荒臺寒

題孫萬戶蘇武圖

羝羊不乳歲時深萬里歸來鬢雪侵麟閣千年今不見
丹青誰解寫丹心

途中聞鷓鴣杜宇聲一絕

深藏古木鷓鴣鳴響裂青山杜宇聲歸去路遙行不得
二禽相答正闌情

題孫甥子恭孝友堂

吳禮

我愛孫郎好弟兄若翁雖死亦如生春風堂上慈顏喜
日日開簾看紫荆

歌風臺

洪焱祖

可是歌風念故鄉匹夫萬乘豈尋常不知身後閨門禍
只道無人守四方

汴學

朝元競託新宮麗相國猶存古寺雄
壁水枯荷人不
到石經零落臥秋風

縣廳獨坐

瑞山花發雜青紅案牘全稀犴獄空
數片閒雲窺吏散飛來庭下舞輕風

題古城石壁

上有汪王廟

汪澤民

煬帝南遊四海兵石門憑險待時平
至今萬歲山頭廟

猶有居民說古城

休寧縣斷崖

汪莊

青山欲盡兩崖開
白鳥飛邊一水迴
遠聽歌聲何處發
荒煙落日釣船來

拒霜花下野鴨圖

花入霜天織女機
綠肥紅膩寫芳菲
一鳬花底多幽思
立盡秋光不自飛

舟中和韻

雙槳輕風送小舟倚篷延佇散離愁來牛去馬江村路
紅樹人家是越州

看花

王詵

隨步看花花正開今朝零落滿蒼苔不須苦恨三更雨
歲歲春風去又來

登師山一

鄭玉

城上鐘聲度遠溪扶桑破曙海雲低披衣欲起還欹枕
山下晨雞四面啼

二

山前村落亂高低雲意模糊遠近迷萬疊峰巒如畫展
黃山恰在小樓西

覆船山樵歌五首

行客初登半嶺間石門深鎖路迴環若將泉水論高下

應是東南第一山

右小石門

路入黃茅劒斷蛇踈籬石礪野人家山深地冷春難老

五月巖前見落花

右童家礪

巨靈斷斷此崔嵬好事題名幾度來不用碧紗籠石上

但令風雨長莓苔

右斷
巖

歷盡崎嶇上碧岑高山飛瀑似鳴琴何須水樂尋幽洞

自有巖前太古音

右響
泉

常憶當年武肅王金婆店裏月華光山中十月桃應熟

未薦仙人不敢嘗

右金
婆店

休寧道中一

程文

雨霽浮嵐翠欲迷村村垣屋樹高低山深路險難騎馬

借得芒鞋過小溪

二

小火原頭燒麥芒收殘菜子插新秧健兒趁得溪流漲
一夜乘槎到富陽

題王清夫東雨閣

閣上留題百卷詩王郎與客讀多時好風吹送東來雨
濕透青衫總不知

題潘和仲桃溪圖後

故人家住桃溪上我住桃溪西復西何日穿雲度溪水
碧桃花裏聽鶯啼

有感

白頭郎吏泣江邊故里丘墟未足憐腸斷梨花寒食雨
金魚墩上雪林阡

江陰吳士明花園一

馬肅

松風微動涼生座竹雨初收青近人日日憑軒舉春酒
不知朝市馬蹄塵

二

虛亭面面壁玲瓏
庭下遊魚白間紅
久坐不知香霧濕
竹闌干外藕花風

讀檀道濟傳

汪午

啓釁真由白面生
北來誰禦佛狸兵
始知誤聽讒人口
壞却防邊萬里城

丁亥題店壁

汪斌

渡水歸樵憇柳磯
滿山紅樹暎斜暉
誰知不是真圖畫

却悟前汀白鷺飛

題柳溪

程養全

堤柳扶疎溪水清
綠陰消得杖藜行
幽懷只許沙鷗覺
時向磯頭管送迎

題韓幹畫太宗馬并御跋

當年承詔畫權奇
奎畫昭回聖語垂
不是九重深眷注
箭瘡辛苦有誰知

小像自題

汪琮

行年六十貌峻嶒解事丹青為寫成今日相看俱未老
他年應遜我為兄

黃山虎頭巖

鮑深

巨石硤研類虎蹲野羊山大半銷魂遊人不怕巖前路
直踞於菟進一尊

祥符寺

森然古木覆苔陰四顧蒼山一徑深六月長廊不知暑
飛泉終日響潮音

錢畢公大還山

朱升

楊枝袅娜酒旗搖人去人來朱雀橋
老我送君人送我
遲遲幾許意難消

夜過叢山關

汪廣洋

山黑怕聞猿嘯哀
關門魚鑰報重開
健兒把燭更深立
爭道前年使客來

山行一

前村後村溪水涸
大樹小樹梅花開
一雙野鶴避人去

四壁雲山傍馬來

二

曾聞東掖郎官說七郡好山如米多松風吹衣水流急
疑在王宮谷裏過

席中用趙子常詩韻贈魯志敏

白髮近如春草生可恨十年成底名雞鳴拔劍背燈舞
風雨草堂銷客情

東朱伯徽

紫陽山下朱徵士白髮近來垂滿肩
清晨拄杖出門去
為斲昌陽求引年

中條山

平沙漠漠草蕭蕭
一劒寧論萬里遙
猶愧未償山水願
暮衝寒雨過中條

題枯枝寒禽

詹書

王母宴歸西海上
空留青鳥羽參差
黃雲苦竹江南雪
獨主寒條歲晚時

題水殿納涼圖

湖上闌干百尺臺，臺邊水殿倚雲開。
紅橋人隔荷花語，玉盃金盤進雪來。

舟過黃陵廟

黃陵廟下倚船窻，水淺沙平屬玉雙。
山外斷雲寒日晚，半篷寒雪下湘江。

題李白醉飲圖

百川鯨吸散清狂，豈但文章萬丈光。
最是有功唐社稷，

眼中先識郭汾陽

詠蟋蟀

趙汴

赤赳晶熒何處歸秋來清響傍庭闌莫言微物無情思

風虎雲龍共一機

先生年十二時從胡井表學于家塾賦此詩胡大驚異賦乳燕詩以答之

云他年高拂雲霄上莫負當時乳哺恩

山間雜題

月色入簾看欲盡泉聲坐久聽如無枯松結得新篁伴

同上寒窻作畫圖

山居

高枝密葉一時空
倚杖沉吟落木中
亂後山居無紀歷
偶來林下見西風

讀宋人文

六經明晦總關天
白首窮經讀斷編
石介不生王令死
荒郊古塚鬼談玄

和葉宗茂題壁韻

汪德鈞

華山一枕白雲高
三峽扁舟駕怒濤
出處自由人取舍

聰明偏任世間勞

次韻題王仲肅書房畫壁

鄭潛

野石層層立翠螺
幽篁蒼樹晚煙多
夢回渾作江南看
滿壁秋聲落礪阿

建南九曲櫂歌

櫂歌聲遠慢亭空
千載滄洲興味同
今日紫陽山下客
他年人喚采芝翁

舒城廬江道中

朱模

田間農婦騎秧馬林下齋僧擊木魚試把一聯閒課吏
詩成能就馬前書

六安山中

五十蹉跎六十翁暫拋筆硯領兵戎臨邊收盡逃亡卒
馬上能開一石弓

訪程九萬不過

葉保翁

曉發松蘿醉未醒不辭騎馬到林垌道人何處尋龍去
閒却一樓山色青

遣懷

繁昌縣前白楊樹隨處柴門逐水開
可是夜深風露冷
流螢一箇度江來

寄錢公濬

程彌壽

小樓獨倚聽潺湲
林木陰濃白晝閒
他日共君何處飲
舉杯相對九華山

贈同舟從軍林生

任原

青天無盡碧波長
百尺雲帆挂夕陽
海路音書何處寄

北風征鴈不成行

九賢詠

至元丙子李世達之亂萬戶富珠哩敬下令屠歛休諸邑歛人丘龍友等率父

老詣軍門言亂者非百姓意請全活之以廣弔
伐之仁萬戶許之遂承制以龍友知徽州婺源
人汪元龍佐之歛人鄭安知歛休寧人陳宜孫
知休寧趙象元程隆佐之元龍弟元圭知婺源
祁門人方貢孫知祁門程克柔佐之蓋
諸公有惠于鄉邦甚大因各賦一詩

金夢巖

陰谷難回草木春一言能廣好生仁百年桑梓無鋒鏑

知是公為首倡人

右同知徽州
事丘公龍友

越國聞孫衆所宗力修文德化兵鋒天如不為吾邦計

一日安能得二龍

右徽州路治中汪公元龍

四野悲歌不忍聞直將仁義動三軍至今來往沙溪土

猶有人傳鄭令君

右知歙縣事鄭公安

生民塗炭世多虞保聚功深與衆殊坐遣一方成按堵

弗齋元不是迂儒

右知休寧縣事陳公宜孫

請命轅門事可徵為民寧復計金繒花封細讀題名記

只有先生不負丞

右休寧丞趙公象元

一尉能安百里民熙熙耕鑿幾回春往來共指黃墩廟

忠壯雲仍世有人

右休寧縣尉程公隆

漠漠風塵靖一鄉書聲重起晦翁堂試評海內瘡痍郡

誰似元方與季方

右知婺源縣事汪公元圭

聞君家世出秋崖鄉邑鳴琴衆所諧德政况當兵燹後

甘棠終古繫民懷

右知祁門縣事方公貢孫

肯憚區區薄領煩左持文牘右橐鞬民安盜戢君能事

不愧當年武狀元

右祁門縣簿程公克柔

四皓圖

舒頔

局面何曾肯放閒
看來著著是機關
當時汨沒知何限
幸爾圍棋不出山

偶成

燕子穿花帶雨飛
杜鵑聲苦勸人歸
靜觀世事何時了
小吏敲門逼戰衣

月夜與曰欽朱先生坐草齋
范冉

草屋儲書傍竹低
屋東野草與牆齊
夜深閉戶放月入

不耐莎雞竹外啼

題小畫留別韓文忠二尹

范準

夜來夢到吳塘路月冷霜寒白鴈啼今日題詩看畫處
隔江山色是淮西

苦熱一

曹遷

樹影團團久不移日當亭午更遲遲不知酷暑還多少
到得秋風葉落時

二

六合炎炎暑氣浮
火雲如水向西流
南風不解人間愠
只在君王殿閣頭

途中即事

呂旭

怪柳類人懸
怒癭好花笑
客逞嬌容小
橋路轉清溪曲
水滿山槽碓
自春

過汝寧府

孫英

鶩鴨池邊春草青
居人云是蔡州城
當時雪夜擒元濟
消得裴公一戰兵

題秋江獨釣圖

孤舟蕩漾出江干
秋水涵空綠樹寒
更盡水源尋絕境
莫教征税及漁竿

洪武癸亥春以公事出會寧北境一

鄭桓

達納城邊春水生
百花原上骨縱橫
荒郊露宿不成寐
一夜大風吹到明

二

解鞍夜宿索歡川漠漠平沙祇見天睡覺忽驚風露冷
仰看斗柄已西旋

三

北出長城古塞邊
荒松落日少人煙
隔河又是河西地
過得燉煌是酒泉

四

雲山高聳入青雲
下有黃河一帶分
粉堞數家高作塞
黃羊千百動成羣

五

沙葱野韭隨時采
蘆酒黃牛取次嘗
萬里驅馳關塞外
忽驚風物憶江鄉

六

山下荒城古會州
唐家當日此防秋
英雄已矣空形勝
惟見黃河水自流

七

黃河岸上雪山前
駝馬如雲記昔年
部落一從星散後

却抄民籍學耕田

八

荒原人家今少存
好田俱是官軍屯
前山遙見黑城子
渴飲不知河水渾

題子陵釣臺

吳生

富貴都歸一釣竿
高風贏得古今看
雲臺冠冕須臾事
不及羊裘耐歲寒

漢將射獵

方勉

將軍意氣自豪雄
驍騎翩翩入塞中
頑石向來猶沒矢
肯教真虎匿荒叢

梅花

花香未入離騷譜
實熟堪調商鼎中
用舍在天無預已
不須回首問東風

鳳池四景一

程思溫

玉殿分行曉侍班
退朝花底珮珊珊
鳳池春暖多清暇
自把龍涎試博山

二

我冠天上紫薇郎
染翰朝朝侍玉皇
賜得香羅輕疊雪
西清閒坐午風涼

三

金井梧桐落葉稀
傳宣初罷出彤闈
玉堂學士多相識
共載雕鞍馬上歸

四

滕六飛花舞朔風
絲綸閣下繡簾櫳
玉堂半醉宮壺酒

坐擁金爐獸炭紅

聞鴈憶第百户侶會別海州 程信

夜下江城每並歸日長沙渚更相依一從嘹唳雲霄後
南北隨時各自飛

天津遇滕自明都憲一

天津橋上水雲橫紅蓼灘頭暫駐兵行盡人家無犬吠
却從海口看潮生

二

王師萬里下蠶叢旗轉天津快午風忽遇舊游中執法
暫同杯酒話征東

虎圖

汪德

腥風凜凜出山阿吮血磨牙奈爾何力困有時遭急縛
畫堂常見寢皮多

武帝馬圖

吳麓

相如歌頌雖無敵汲黯忠言未可輕若使武皇能早悟
龍駒不在渥洼生

十八學士登瀛圖

附鳳攀龍幾俊英一時遭遇若登瀛不知獻納論思際
曾亦陳詩到鵲鴒

江右平寇卷和韻為致政都憲程公賦一

蘇景元

繡衣持斧不辭艱獨領孤軍入萬山生縛渠魁破巢穴
萌芽不遣一人還

二


雲收霧卷見神奇
賊死民安在片時
贏得童謠滿江右
南征從此罷王師

三

解下兜鍪位上卿
月明京國萬方清
君王奠枕無邊慮
爭和鐃歌頌太平

四

繡袍年久汗痕斑
曾領偏師碎鐵山
功遂名成乞歸去
松楸千樹古城關



新安文獻志卷五十七